



## **KENYATAAN MEDIA**

**MENTERI SUMBER ASLI DAN ALAM SEKITAR  
YB DATO SRI DR. HAJI WAN JUNAIDI BIN TUANKU  
JAAFAR**

**SAMBUTAN HARI HARIMAU SEDUNIA 2016  
(GLOBAL TIGER DAY 2016)**

**29 JULAI 2016**

---

Hari Harimau Sedunia atau *Global Tiger Day* disambut pada 29 Julai setiap tahun bertujuan memupuk kesedaran tentang pemuliharaan harimau di dunia. Inisiatif tahunan *Global Tiger Day* telah diisytiharkan pada tahun 2010 melalui persetujuan 13 negara “tiger range states” (*The St. Petersburg Declaration on Tiger Conservation, November 2010*) sempena Global Tiger Summit di St. Petersburg, Rusia.

Pada persidangan itu juga, 13 negara tersebut termasuk Malaysia telah bersetuju untuk mempergiatkan usaha pemuliharaan harimau liar dengan sasaran menggandakan populasi harimau liar di negara masing-masing menjelang tahun 2022.

Tema sambutan *Global Tiger Day* pada tahun ini ialah “Giving wild tigers a future”. Tema ini mencerminkan keperluan setiap lapisan masyarakat

untuk sama-sama memainkan peranan dalam memastikan harimau liar dapat hidup sejahtera di habitat asal dan menghalang kepupusan.

Malaysia sangat beruntung memiliki kepelbagaian hidupan liar yang tinggi dan masih terpelihara termasuklah harimau liar yang masih membiak dan aktif di beberapa habitat yang dilindungi. Namun begitu, faktor utama penurunan populasi harimau di dunia termasuk Malaysia adalah kehilangan habitat, pemburuan haram, perdagangan haram hidupan liar dan konflik manusia-harimau.

Kesedaran awam terhadap usaha pemuliharaan harimau di negara kita perlu ditingkatkan dan disemai kepada generasi muda. Selain itu, persepsi generasi lama kepada kepercayaan karut terhadap kelebihan dan khasiat bahagian-bahagian harimau perlu dihapuskan dan seharusnya lebih prihatin terhadap isu pemuliharaan hidupan liar khususnya harimau.

Melalui kajian yang telah dijalankan oleh Jabatan PERHILITAN bersama beberapa agensi bukan kerajaan (NGO) di 3 kawasan habitat utama harimau di Malaysia (Taman Negara, Endau-Rompin dan Belum Temengor) di antara tahun 2010-2013, didapati anggaran populasi harimau adalah di antara 240 hingga 350 ekor yang masih berkeliaran di habitat tersebut.

Sebagai manusia, kita semua berkait rapat dengan alam semulajadi dan unsur-unsur alam yang memberi kesan kepada kehidupan kita. Aktiviti manusia yang keterlaluan dan mementingkan kebendaan semata-mata tanpa memberi pertimbangan terhadap alam semulajadi akan memudaratkan hidup kita dalam jangka masa panjang. Oleh itu, kita semua mempunyai peranan untuk membanteras aktiviti jenayah hidupan liar termasuklah pemburuan dan perdagangan haram serta eksploitasi hidupan liar bagi memastikan kelangsungan hidup spesies yang penting bagi ekosistem seperti harimau.

Kerajaan telah memperbaharui komitmen dalam *United Nations Sustainable Development Goals (SDGs)*, yang bermatlamat untuk memerangi dan menamatkan pemburuan haram dan penyeludupan hidupan liar. Sebagai komitmen kita kepada inisiatif untuk menggandakan bilangan harimau liar, kerajaan telah memperkenalkan Pelan Tindakan

Pemuliharaan Harimau Kebangsaan (*National Tiger Conservation Action Plan*, NTCAP) 2008 – 2020 di mana beberapa strategi telah dikenalpasti termasuk perlindungan habitat, perlindungan spesies, penyelidikan dan pengurusan konflik. Kerajaan juga telah memperuntukkan sebanyak RM18.7 juta menerusi Rancangan Malaysia Ke Sebelas (RM ke-11) untuk melaksanakan projek Survei Harimau Kebangsaan Pertama (1<sup>st</sup> *National Tiger Survey*, 1<sup>st</sup> NTS) yang mula dilaksanakan tahun ini meliputi habitat harimau di hutan-hutan *Central Forest Spine* (CFS).

Keputusan *ASEAN Member States* semasa persidangan *10th ASEAN Ministerial Meeting on Transnational Crime (AMMTC)* pada 29 September 2015 secara rasminya memasukkan komponen '*Trafficking of wildlife and timber*' ke dalam senarai keutamaan jenayah merentasi sempadan. Oleh yang demikian, Kerajaan akan terus memberi komitmen dan mengambil langkah sewajarnya dalam menangani jenayah hidupan liar merentasi sempadan melalui kerjasama antara agensi-agensi dalam negara dan agensi-agensi antarabangsa yang berkaitan.

Kerajaan juga menghargai peranan masyarakat dan kerjasama erat yang terjalin dengan pertubuhan badan bukan kerajaan (NGO) seperti Malaysian Conservation Alliance for Tigers (MYCAT), World Wildlife Fund (WWF), Malaysia Nature Society (MNS), Wildlife Conservation Society (WCS), The Wildlife Trade Monitoring Network (TRAFFIC), dan lain-lain NGO yang turut melaksanakan tanggungjawab dalam pemuliharaan harimau dengan membantu kerajaan melaksanakan program kesedaran awam berkaitan kepentingan pemuliharaan flora dan fauna serta penyaluran maklumat berkaitan jenayah hidupan liar negara.

Akhir kata, saya memohon seluruh rakyat Malaysia daripada para penggubal undang-undang dan dasar negara, penuntut universiti, pelajar sekolah, pesara, badan korporat, syarikat swasta, badan bukan kerajaan serta semua lapisan masyarakat untuk meningkatkan pengetahuan dan kesedaran kita berkaitan kepentingan pemuliharaan harimau dan menyokong usaha kerajaan dalam memenuhi komitmen terhadap pemuliharaan harimau yang lebih dikenali sebagai Harimau Malaya, spesies kebanggaan negara dan simbol kemegahan kerajaan Malaysia.